

Protocol da la radunanza generala dals 3 december 2015, a las 20.30 i'l Restorant Chasa Veglia

Tractandas

1. salüd dal president e s-chüsas
2. tscherna scrutinadurs
3. prelecziun dal protocol da la radunanza generala 2014
4. rapport annual dal president
5. rapport da la chaschiera e dals revisurs da quint
6. rapports dal schef da pista, schef da turas, delegià Traversada e Stafetta tras Sent
7. mutaziuns ed onurificaziuns
8. müdamaints statuts art. 11, 12 e 16
9. tschernas
10. fixar contribuziun annuala
11. program da l'on
12. varia

1. salüd dal president e s-chüsas

A las 20.40 po il president Christian Poo salüdar a 27 commembers (inscrits illa glista da preschentscha). S-chüsats s'han il schef da pista Jon Buchli, Chasper Buchli, Georg Buchli, Maja e Men Bischoff, Evar Zanetti, Duri Valentin, Chasper Valentin, Aita Stupan, Dominique Benderer, Anna Barbla Buchli, Chasper Alexander Felix e Gianna Rauch.

L'invid es gnü tramiss tenor statuts, uschè cha la radunanza es abla da trar decisiuns. La glista da tractandas vain approvada sainza müdamaints.

La radunanza s'adozza per ün minut da silenzi in memoria dad Otto Augustin.

2. tscherna scrutinadurs

Sco dombravuschs vegn eletta Braida Pinggera.

3. prelecziun dal protocol da la radunanza generala 2014

Il protocol da la radunanza generala 2014 es gnü tramiss insembel cul invid. El vain approvà sainza cuntravuschs.

4. rapport annual dal president

Il president rapporta davart l'inviern passà cun fich paca naiv, al cumanzamaint dafatta cun plövgia. Dürant Nadal e Büman s'esa stat cuntaint vi la Motta Naluns sco eir giò la loipa da la naiv artificia. El orientescha davart occurrenzas dal club dürant l'on scuors. La joslada oura Vastur ha stuvü gnir clomada giò causa mancanza da naiv ed üna via inglatschada pervi da la plövgia. Tschellas occurrenzas han pudü avair lö plü o main tenor program. El ingrazcha a tuot ils voluntaris chi'ns sustegnan adüna pro arrandschamaints. Ün ingrazchamaint va eir als sponsurs chi'ns sustegnan adüna darcheu cun premis o oters sustegns. Plünavant ingrazcha el eir a tschels commembers dal comitè ed a Roland Franciscus chi ha surtut dad Andri Gritti la carica da tempader. Eir scha las previsiuns actualas nu prevezzan amo chi detta naiv, spera'l el chi detta a la fin darcheu ün inviern cun blera naiv e natüralmaing sainza accidaints.

5. rapport da la chaschiera e dals revisuors da quint

Quist on s'haja darcheu pudü serrar giò il quint cun ün pitschen guadogn. Il club ha fat ün gudogn da da 73.40 fr. dürant l'on scuors e'l chapital agen importa uossa 23'703.10 fr. Ün'expensa extraordinaria e magari ota cun 807.- fr. es statta l'inscripziun dal Cuvel da l'Iva i'l cudesch fundiari. Ün ingrazchamaint special va als sponsurs chi contribuischan minch'on vi da premis per las cuorsas: a Domenic Augustin, l'ustaria da Crusch e la Chamonna Naluns da Roger Taverna.

Il club ha uossa 150 commembers, da quels 40 commembers libers.

Ils revisurs da quint Duri Valentin e Chasper Buchli han revis il quint. Quel vain fat bun cun dar dis-charg als organs responsabels.

6. rapports dal schef da pista, schef da turas, delegià Traversada e Stafetta tras Sent

Il president rapporta amo in nom dal schef da pista a regard las cuorsas dal club. Pervi da la mancanza da naiv ha il passlung da not darcheu gnü lö a Ftan. I s'han partecipadas 20 persunas al passlung, 24 al slalom e 31 al slalom gigantesco e quai adonta da la trid'ora la dumengia. La pista pellas prosimas cuorsas dal club es reservada. Plünavant ingrazcha el pel sustegn chi s'ha per organisar quistas cuorsas. In seis rapport manzuna il schef da pistas ch'el as metta a disposiziun per ün'ulteriura perioda d'uffizi.

Il schef da turas, Andri Poo po comunicar chi s'haja pudü far üna bella tura d'ürant l'inviern passà. Ün dals partecipants, Filipe Sousa deriva dal Portugal e sarà stat il prüm Portugais chi s'ha partecipà ad üna gita da skis dal club skiunzs Sent. Per quist on ha'l darcheu previs da far duos gitas e tenor relaziuns saja forsa dafatta la pussibilità dad üna gita implü. Las datas provisoricas sun publichadas sül plan da l'on. In cas da spostamaints gnissan quels publichats illa chaistina chi's rechatta uossa dadaint l'entrada dal Sport Champatsch.

Cla Rauch rapporta davart la 15avla Traversada. Fingià duos mais avant la Traversada füss statta la chamonna Sesvenna plaina. Causa cha singuls han lura clomà giò o decis da nu durmir in chamonna, han finalmaing pudü tour part tuot quels chi vaivan interess, eir quels chi s'han annunzchats plü tard. 112 sun partits e 111 rivats al böt. Ün ingrazchamaint special va als guardgiachamonnas da la Heidelberger e la Sesvenna chi han cuntribui minchün 500.- vi dal pulloverins da giubileum chi sun gnüts surdats a mincha participant. Dal 2016 nun ha lö nossa Traversada, i varà lö però darcheu la Traversada dal Vnuost. La prosma Traversada da Sent ha lö als 1. lügl 2017.

Nataglia Caviezel rapporta davart la Stafetta tras Sent. Quella ha funcziunà fich bain, eir causa il sustegn da Tina e Christian cul team da l'ustaria. Fabiana Wieser ha organisà il „s-chodar aint“. La stafetta vendschadra ha dovrà be 4:32 min. Nataglia prevezza da far darcheu tragets plü lungs, uschè chi's po giodair ün pa plü lönch quista stafetta. In tuot s'han partecipadas 18 squadras. La prosma stafetta varà lö in gün, la data vain fixada plü tard.

7. mutaziuns ed onurificaziuns

Sco novs commembers vegnan bivgnantadas las seguaintas persunas: Brigitte Rathmer, Conrad Benderer, Fabio Lombardo, Fadri Riatsch, Gian Luca Taverna, Michel Ebben, Nienke Ebben, Ruedi Bisang, Talina Mayer ed Urezza Felix.

Sortits sun: Olga e Christian Häny, Francesco Lombardo, Manfred Koch, Men Linsel, Reto Luppi, Sepp Erni ed Ursina Stecher.

Rosina Müller e Jon Carl Rauch vegnan onurificats sco commembers veterans cun quai ch'els fan part 25 ons al club da skis da Sent. Ad els pertocca sinceras gratulaziuns.

8. müdamaint dals statuts

Davo cha'l schef da material Plasch Caviezel ha inoltrà sia demischiun ha il comitè fat ponderaziuns davart quista successiun. Plü bod vaiva il club bler material da cuors chi staiva gnir chürà. Uossa appartegna tuot quist material a tuot ils clubs da la regiun ed as rechatta vi la Motta Naluns. Be amo pac material (material d'ustaria e l'ura) es amo i'l depot. Uschè ha quista carica pers sia funcziun uriunda. L'ura s'vess vegn chürada inamöd dal tempader. Il comitè propuona perquai a la radunanza da strichar quista carica e da surdar las incumbenzas al schef da pista, chi vess nom a partir dad uossa schef da cuorsa. Ün argumaint implü es eir cha'l comitè as cumpuoniva pel mumaint da 6 suprastants, ün numer insolit per ün comitè.

Uschè decida la radunanza cun unanimità da las vuschs da müdar ils seguaints artichels: 11, 12 e 16. Las consequenzas sun cha las funcziuns dal schef da material vegnan surdattas da nouv al schef da cuorsa. Il comitè consista in avegnir be amo da 5 commembers e'l schef da pista survain da nouv il nom: schef da cuorsa.

9. tschernas

Tenor statuts vegls ston gnir elets d'ürant ils ons dispèrs l'actuar, il schef da pista e'l schef da material. Causa la revisiun dals statüts ston damaja gnir elets be amo l'actuar e'l schef da cuorsa. Quels as mettan darcheu a disposiziun e vegnan reelets cun applaus

Uschè as cumpuona il comitè uossa seguaintamaing:

president:	Christian Poo
actuar:	Mario Rauch
chaschiera:	Martina Weiss
schef da cuorsa:	Jon Buchli
schef da turas:	Andri Poo

revisurs da quint: Duri Valentin e Chasper Buchli

Davo las tschernas vegna surdat a Plasch Caviezel ün regal per seis ingaschamaint pel club skiunzs Sent. El s'ha declerà pront da sustegner inavant al club in cas da bsögn.

10. fixar contribuziun annunala

La contribuziun annuala vain fixada sün 25.- fr. per personas sainza commembranza da Swiss-Ski. Ils commembers cun commembranza da Swiss-Ski pajan 50.- fr.

11. program da l'on

Il program da l'on es gnü protramiss. Da nouv ha darcheu lö üna cuorsa da passlung RPN a Fuldera. La cuorsa da skis da la Coppa BEST ha lö als 6 marz e na sco publichà als 5 marz 2016. La data da la Stafetta vain amo datta cuntschainta, forsa as poja cumbinar alch arrandschamaint in connex cullas maestranzas europeicas da ballapè chi han lö eir d'ürant quist temp.

12. varia

Christian orientescha davart il cuvel da l'iva. Davo cha quel es uossa inscrit officialmaing i'l cudesch fundiari ha el pisserà per duos fanestras chi gnissan manadas sü e fixadas d'ürant quist inviern. Uschè nu poja plü gnir aint naiv cur chi sbischa. Plünavant ha el eir chattà üna pitschna platta chi pudess gnir missa aint il Cuvel. El sclerischa amo che chi pudess gnir realisà amo per til mantgnair eir pel avegnir.

Davart Andri Linsel es gnüda la dumonda quant inavant cha'ls clubs hajan cugnuschentscha da quista nouva organisaziun da sponsoring e voluntaris pel sport illa regiun. Christian ed Andri Poo sun gnüts invidats sco commembers dal club e dan infuormaziuns. I regna magari gronda skeptica davart las consequenzas cha tuot vess pel club. Ün pool da material po sgüra esser radschunaivel, ma nos club viva da seis commembers ed agüdants chi nu saran prontos da sustgnair lura ad otras organisaziuns. I nu po neir na esser chi's vess dad entrar in ün'organisaziun chi cuosta alch e nu s'ha nöglia landervia. Per attrar sponsurs gronds pellas organisaziuns grondas (RPN, CDH Engiadina) saraja sgüra d'avantag, als clubs pitschens portaraja pac. Eir davo quista sairada d'eiran bleras dumondas amo avertas.

Christian orientescha davart ils müdamaints chi dà ill'organisaziun RPN. Gerhard Hauser ha surtut il presidi da Marco Müller. Ulteriurs novs commembers sun Rico Kienz e Seraina Bickel. Mario Denoth ha desdit sia piazza sco manader da la classa da sport.

Mario dà infuormaziuns a regard la cuorsa Martina – Scuol. I s'es in trattativas cun ün nouv sponsor principal chi dess pels prossems 5 ons üna gronda contribuziun. Tscherts detagls esa amo da sclerir cun oters sponsurs. Schi's vegn da far giò quist contrat füss la cuorsa garantida pels prossems ons.

Tina Weiss surdà amo 4 buns als trenaders dals differents OJs da nos club, a Dominique Benderer, Armon Nuotclà, Marlies Zimmermann e Curdin Preuss.

A las 21.40 serra il president la radunanza ed ingrazcha a la chaschiera pella marendina ch'ella ha preparà.

L'actuar

Mario Rauch